

四庫全書

史部

欽定四庫全書

史部

欽定續通典卷九十二

詳校官監察御史<sub>臣</sub>曹錫寶

洗馬<sub>臣</sub>王坦修覆勘

校對官編修<sub>臣</sub>周厚轅

謄錄監生<sub>臣</sub>徐鑒

欽定四庫全書

欽定續通典卷九十二

兵

臣等謹案杜佑作兵典其序以西漢之重兵在京師為得宜東漢至唐之藩翰力盛為失策洵為切中事理然于兵之本計則尚未悉也夫古聖人之重兵也久矣周禮大司馬中春教振旅遂以蒐田中夏教茆舍遂以苗田中秋教治兵遂以獮田中

冬教大閱遂以狩田他若五射以教國子五物以  
詢衆庶罔不以兵事為兢兢若是者何哉用戒不  
虞無時可緩也後世以治兵為好武以田獵為禽  
荒以宴安為得體以簡閱為故事軍政日弛而國  
遂以弱矣宋初有禁兵廂兵鄉兵番兵神宗之時  
更有保甲兵非不多也然而將驕卒惰臨陣輒潰  
者外有稽簡之名內無訓練之實失本計也遼金  
及元皆以兵立國故兵勢最為雄健明初改元舊



制自京師達於郡縣皆設立衛所在外則統之都  
司在內則統于五軍都督府復有上十二衛為天  
子親軍亦自成一代之制然往往當其盛也兵將  
相習內外相維故用之而有效及其衰也教閱不  
明行伍虛耗而國事遂不可問亦在本計之得失  
而已杜典為卷十有五為目百四十有奇其於兵  
事畧備矣然古今異宜兵機尤甚今之所續頗有  
損益其事則自唐迄明代凡兵家之論說名將之

事跡皆採擇焉若前典以孫子為綱故諸目之前  
悉冠以孫子兵法今不復重錄惟徵引諸書以符  
前典分門之本意至其分門中間有詞義畧同者  
今則合併之以免繁複云

第一

叙兵 收衆 選擇附  
立軍 論將 搜才附

第二

法制 雜教令附

第三

料敵制勝 敵十五形 帥十過附 察而後動  
馳虛聲知無實 敵降審察

第四

間諜 不信間諜附 行師先在量力不可窮  
兵 臨敵易將 軍政不一必敗 軍無政令

敗 推誠 示信 示義

### 第五

撫士 明賞罰 行賞安衆 分賞取敵 行  
賞招降 示惠招降 軍師志堅必勝 軍將  
驕敗 敵屢勝驕不備可敗 軍行自表異致  
敗 師行衆悲恐則敗 聲感人附 守則有  
餘 守拒法附

### 第六

示弱 示怯 示緩 聲言擊東其實擊西  
示形在彼而攻于此 示無備設伏取之 示  
強 敵軍攻城久不下 師老擊之

### 第七

佯敗引退取之 引退設伏取之 聲言退誘  
敵破之 引退設伏潛兵襲其營 設伏引敵  
關襲其營 設伏引敵關敗之附 示退兵懈  
掩襲 敵退追奔 縱敵退於歸路設伏取之

誘敵進于歸路設伏取之附兵機務速

第八

避銳堅壁持久候隙破之堅壁挫銳不

戰挫銳敵飢以持久獎之因敵飢乘其弊

而取之因敵三鼓氣衰敗之致敵力疲夾

攻敗之陣久疲致敗出其不意擊其不

第九

以逸待勞師不襲遠餌敵取勝受敵餌

取敗附軍勝擄掠被追襲多敗抽軍乘

敵抽軍襲破之附卑辭急敵取之稱降及

和因懈敗之兩軍相對取背破之兩軍相

對繼遣軍助即勝兵多力有餘宜分軍相繼

我寡敵衆自遠至乘疲敗之挑戰敵處

高勿攻敵黨急之則合緩之則離假託安

衆

第十

行軍下營審擇其地鄉導下營斥堠并防  
捍及分布陣先據要地及水草識水泉隔  
山取水越山度險附據倉廩

第十一

攻其必救軍師伐國若中路城大兵多須  
下方過必攻其易毋貪其易附輕易  
致敗乘敵亂而取之分敵勢破之審敵  
勢破之附布陣大勢分易敗惜軍勢力  
少分軍必敗

第十二

按地形知勝負自戰其地則敗據險隘  
塞險則勝否則敗死地勿攻總論其

地形附勵士決戰衆寡勢百相懸勵士攻  
其師乘卒初銳用之激怒其衆

第十三

圍敵勿周圍師量無外援緩攻取攻城  
戰具附絕糧道及輜重火攻火兵附

火獸附

火禽附

火盜附

火弩附

禦

火攻附

無風取勝

水攻

水平及水戰具

附敵

半涉水擊必勝

軍行渡水附禦敵

水軍絕下流敗之

### 第十四

因機設權多方誤之先攻其心奪敵心計

### 第十五

敵無固志可取之歸師勿遏防遁附大陣動則亂因乘而敗之先設伏乘勢逐

敵敗之

乘勝

乘勢先聲後實散衆因

敵懼遂取之

推人事破災異風雲氣候雖

占

### 叙兵

唐李筌太白陰經曰兵之興也有形有神旗幟金鼓依

於形智謀計事依於神戰勝攻取形之事而用在神虛  
實變化神之功而用在形觀形不見其神不知其事是  
以曳柴揚塵形其衆也滅竈滅火形其寡也勇而無剛  
嘗敵而速去之形其退也斥山澤之險無所不致形其  
進也油幕布帔冠諸樹株形其強也偃旗卧鼓寂若無  
人形其弱也故曰兵形象陶人之埏土見氏之冶金為  
方為圓或鼎或鐘土金無常性因功以為名戰陣無常  
勢因敵以為形形不因神不能為變化神不因敵不能

金史卷九十二  
為智謀

宋時禁兵繁冗更戍絡繹天下困於供億蘇軾因應詔獻策論之一曰定軍制二曰練軍實其畧曰郡縣之土兵可以漸訓則禁兵可以漸省苟禁兵漸省而以其資糧益優郡縣之土兵則彼固已戴土之恩而願効其力又何遽不如禁兵邪如此則內無屯聚仰給之費而外無遷徙供億之勞矣又曰自今以往民之願為兵者皆三十以下則收限以十年而除其籍如此則縣官常無



老弱之兵而民不任戰者不至於無罪而死

謂見屠及餌敵

十

年之中有始至者有既久者有將去者有當代者新故  
雜居而教之則緩急可以無憂矣許洞虎鈴經曰古法  
曰散地無戰散地者境內地土也士卒顧家其意未專  
不可戰也輕地則止入敵地尚淺士卒意未堅不可以  
進敵當自堅其心也爭地則無攻山谷險隘之口以弱  
勝強以少擊衆之地也交地則無絕俱可進退之地不  
可以兵絕之衝地則合交有路往來我可以結交于諸

侯也重地則掠深入敵境士卒意已堅固可以掠取財  
物圍地則謀士卒困於險隘關則兵弱持久則糧食乏  
絕則當用謀以免難死地則戰前有高山後有大水糧  
食乏絕進退守備皆無所利當此祇得死戰也洞曰此  
八者古人用八地之法若地協于用則用之不協于用  
則反之反之謂何曰若敵衆深入吾境營壁不完芻糧  
寡少守且不利詎可以散地而不戰乎在我當以必戰  
為約怯退示以必死擒獲示以必賞令立告諸吏士將

戰之際後顧者斬之臨敵而身不定目數移者斬之有  
憂色者偃蹇者相視而動目者遺弓刀器械者金鼓不  
應節者皆斬之獲一首級者亦厚賞之如是則有散地  
之用矣入敵地尚淺險則據而挑夷則守而應慮士卒  
心不固當擇左右前後皆險絕無生路肅部伍嚴節制  
使人人欲自戰是則有輕地之用矣山谷險隘敵人先  
得以控搃我勢我當屯師為大營廣陣務攻具露其氣  
機狀如不密俾敵見之欲敵備在前陰出精銳敢死者循

間道或扼其糧運或搆絕其後凡間道必多險阻或有  
崇巖峭壁之地則為懸梯竹索以陟降之或有深淵絕  
澗則為罌缶渡之敵覺內撓則自營陣中出精兵為應  
內外夾攻有爭地之用矣道路相錯我可以往彼可以  
來利設伏進戰佯北俟逐北過半則舉號發伏衝擊之  
反佯北之師以應有交地之用矣頓泊之地逕達四而  
當選腹心勁勇者各將步騎以扼四衝人數隨多少使  
之雖無交應有衝地之用矣致兵敵境凡屬守備者順

則安之否則夷之資食所獲必付吏士內以悅師人外  
絕敵所恃豈直深入然後用掠乎如是則有掠非止重  
地之用矣大兵將動先料其強弱觀其雲氣察地勢順  
逆審人心向背而後舉焉兵法曰策之而知得失之計  
候之而知動靜之理故得失之道利在先知謀勝於未  
勝慎失於未失者善有死地之圍始謀於軍者必有後  
機之困矣設能反後機而達先知必無圍地之患矣高  
山大澤險阻峭壁沮洳谿逕斷無可生之道此智士用

謀之秋也當出其不意以衝敵動而後擊之奇兵奔衝  
或利用燧馬燧牛如田單揚班之類是也或候夜昏詐  
為號直奔衝敵師混服飾軍伍辨認之類是也如止死  
戰以為期苟敵兵益壯我後不繼則李陵有弓折矢盡  
之困矣戰極力弊當自隕陷能竭智用謀萬變不極則  
無死地之憂矣孫子曰戰貴地利然則地利不可不用  
也但臨時觀其用何如耳兵貴以變設不能以變用兵  
雖得地利無益也學兵用武率以古法為執焉與膠柱

鼓瑟無異耳未見決中者也兵家之利利在變通之機  
觀其逆順夫興師之際先探敵將才不才設若敵將不  
能以兵法使衆惟以勇敢為己任我則順古法以待之  
也或敵將善用古法我則逆古法以待之也夫用兵之  
奇莫奇於設伏設伏之奇莫奇於新智新智者非不師  
古也師古而反之爾古人料敵以其始來戰陣未合先  
以賤而勇者挑之觀其號令旗鼓之整與亂士馬之強  
弱營陣之偏正行伍之齊肅散亂言語之喧譁緘默以

定勝負焉是以古法曰若其衆喧旗亂其卒自行自止其兵或縱或橫其逐北恐不及見利恐不得如此者將必無謀雖衆可獲矣洞曰如古人以此取功苟敵人料我當順其所料伏兵待之以詐示之俟彼出師則發伏兵攻之古法曰杖而立者飢也汲而先飲者渴也見利不進者勞也軍擾者將不重也旗動者亂也吏怨者倦也懸瓶不及其舍者窮寇也淳淳翕翕徐與人言者失其衆也數顧者失其羣也來委謝者欲休息也洞曰如



古人以此料敵今則不然當擇精銳吏士分而伏於衝  
要使其勞倦傷殘者如飢渴失羣之狀或數搖動其旗  
或數驚擾其衆使吏士喧譁應人所料苟出師襲我則  
潛發所伏出其不意擊之古法曰敵始來到行陣未定  
可擊也跋涉長道後行未息可擊也行坂涉險半隱半  
出可擊也涉水半渡可擊也險道狹路可擊也旌旗亂  
動可擊也陣數動移可擊也洞曰在我則不然如以行  
陣未定四面可設伏也長道後行未息中可設伏也行

坂半隱半出長林大谷可設伏也涉水半渡崖岬坡坂可設伏也狹路險道旌旗亂動陣數動移前後可設伏也如或敵人敗走我師未敢逐之防有伏也古法曰鳥起者伏也衆樹動者來也此未必果伏與來也慮為疑兵也已奔遁令老弱者動其衆樹及驚鳥起之類是也又曰無約而請和者謀也半進半退者誘也此亦大兵已潛遁恐後人逐者設為此疑也是以兵法如車也載其物則車也及有車之用則東西南北者由人也故兵

法不可執而用之也

金章宗嘗謂宰臣曰人有以八陣圖來上者其圖果何如朕嘗觀宋白所集武經具載攻守之法亦多難行右丞相清臣曰兵書一定之法難以應變本朝行兵惟用正奇二軍臨敵制變以正為奇以奇為正故無往不克帝曰自古用兵亦不出奇正二法且學古兵法如學奕棋未能自得於心欲用舊陣勢以接敵疎矣敵所應與舊勢異則必不可支第武經所述雖難遵行然知之猶

愈於不知耳

收衆

唐李抱真領昭義軍留後密揣山東道有變上黨且當  
兵衝是時承戰鬪之後土瘠賦重人民益貧困無以養  
軍乃籍戶丁男三選其一有材力者免其租徭給弓矢  
令之曰農之隙則分曹角射歲終吾當會試及期按簿  
而試之以示賞罰復命之如初比三年皆善射抱真曰  
軍可用矣於是舉部內之鄉丁得成卒二萬不仰衣食

於官府而倉庫益實乃繕甲兵為戰具遂雄視山東天下稱昭義步軍冠諸軍又馬燧帥河東以兵力單弱募厮役得數千人悉補騎士教之戰數月成精卒居一年得兵二萬造鎧必短長三制稱士為衣以便進趨為戰車冒以狻猊象列戟於後行以載兵止則為陣器用完銳威震北方

宋种世衡守環州初至青澗嘗課吏民射以銀為射的中者與之或爭徭役優重亦使之射射中者得優處有

過失射中輒釋之或因中否而予奪其所事人人自勵  
皆精於射由是數年敵不敢近環境又張浚曉諭民間  
招軍一百人與補下班祇應招軍二百人與補進武校  
尉招軍三百人與補承信郎以上各有差等令不兩月  
軍致數萬

遼太祖天贊元年以戶口滋繁糾轄疎遠分北達寧額  
為二部立兩節度以統之三年西征党項等國俘獲不  
可勝紀四年又親征渤海天顯元年滅渤海國地方五

千里兵數十萬五京十五府六十二州盡有其衆自此益强大莫之能禦

金舊無鐵景祖時鄰國有以甲冑來鬻者必傾貲厚價以與貿易亦令昆弟族人皆售之得鐵既多因之以修弓矢備器械諸部來附者衆景祖收而團練之兵勢於是漸振矣至穆宗將伐蕭哈里募兵得千餘人女直兵未嘗滿千至是太祖勇氣百倍曰有此甲兵何事不可

圖也

元星濟奉詔守江州時江州已陷賊據池陽號百萬太平官軍止有三百人衆皆欲走星濟曰畏賊而逃非勇也坐而待攻非智也汝等皆有妻子財物縱逃其可免乎乃貸富人錢募人為兵一日得三千人軍聲大振遂復池州

選擇附

唐郭子儀率朔方兵破史思明於藁城南攻趙郡擒賊四千還常山思明更以衆數萬尾軍子儀選騎五百更



出挑之三日賊引去乘之再破於沙河又李愬募死士  
三千人為突將自教之

五代周世宗即位既敗北漢兵於高平謀肅軍政謂侍  
臣曰凡兵務精不務多今以農夫百未能當甲士一奈  
何浚民之膏澤養此無用之人乎且健懦不分衆何所  
勸乃命大簡諸軍精銳者升之上軍羸者斥去之詔募  
天下壯士咸詣闕選其尤者為殿前諸班其騎步諸軍  
各命將帥選士由是士卒精強所向皆捷

宋韓世忠與岳飛並置背嵬軍皆勇鷙絕倫者故俱能以少擊衆又淮東制置使許國檄趙葵曰兵不能集集不能精奈何葵曰請視兩路之兵別其精銳君侯留二萬於帳前敵不敢動矣國曰不若集淮兵來閱而君董之既足示衆亦可選銳葵曰有兵之郡必當衝要守將豈肯空壁以從制使命耶必將力爭於朝分留自衛一得朝命必匿其強壯遣老弱以備數本欲選銳適得其鈍本欲示衆適示單弱徒啟敵心不聽卒敗

遼凡舉兵皇帝親點將校又選勲戚大臣充行營兵馬都統副都統都監各一人又選諸軍兵馬尤精銳者三萬人為護駕軍又選驍勇三千人為先鋒軍又選剽悍百人以上為遠探欄子軍故兵無不善戰者

金選弩手之制先以營造尺度杖其長六尺立之謂之等杖取身與杖等能踏弩至三石鋪弦解索登踏閑習射六箭皆上垛內二箭中貼者又選親軍取身長五尺五寸善騎射者明安穆昆以名上兵部移點檢司宣徽

院試補之

明韓雍計峒賊最強方設策進勦新會縣丞陶魯自請  
征雍曰所將幾何而辯曰三百人足矣曰何少也曰魯  
猶以為多兵貴精請任選擇雍從之魯乃標約式令曰  
有力能舉百鈞矢射二百步者來三軍之士十五萬人  
比於式者二百五十人曰未也復募數日始定魯乃為  
別將日操練陣法椎牛犒軍甘苦共之士爭願為死率  
以先登大破賊又蜀盜藍鄙叛僉事馬昊佐治兵甫至

聞所部曰將不知兵若何求勝擇驍勇才力千人分四  
隊隊立長會賊來逼城晁夜出百騎舉砲擊賊賊營亂  
自蹈藉晁悉兵從後乘之斬首四千級再前遇賊賊方  
陣於左而伏兵於右為應晁以正兵當左乃身與百騎  
直擣伏賊驚潰趨左左陣亦潰遂合兵縱擊火其柵大  
破之

### 立軍

唐高祖初起開大將軍府得兵二十萬武德初始置軍

府以驃騎車騎兩將軍府領之析關中為十二道曰萬年道長安道富平道醴泉道同州道華州道寧州道岐州道幽州道西麟州道涇州道宜州道皆置府三年更以萬年道為參旗軍長安道為鼓旗軍富平道為元戈軍醴泉道為井鉞軍同州道為羽林軍華州道為騎官軍寧州道為折威軍岐州道為平道軍幽州道為招遙軍西麟州道為苑遊軍涇州道為天紀軍宜州道為天節軍軍置將副各一人以督耕戰以車騎府統之六年

廢十二軍改驃騎曰統軍車騎曰別將居歲餘十二軍復而軍置將軍一人軍有坊置主一人以檢察戶口勸課農桑太宗貞觀十年更號統軍為折衝都尉別將為果毅都尉諸府總曰折衝府凡天下十道置府六百三十四皆有名號而關內二百六十有一皆以隸諸衛凡府三等兵千二百人為上千人為中八百人為下府置折衝都尉一人左右果毅都尉各一人長史兵曹別將各一人校尉六人士以三百人為團團有校尉五十人

為隊隊有正十人為火火有長凡民年二十為兵六十而免其能騎而射者為越騎其餘為步兵武騎排攢手步射其隸於衛也左右衛皆領六十府諸衛領五十至四十其餘以隸東宮六率凡發府兵皆下符契州刺史與折衝勘契乃發若金府發則折衝都尉以下皆行不盡則果毅行少則別將行凡當宿衛者番上兵部以遠近給番五百里為五番千里七番一千五百里八番二千里十番外為十二番皆以月上若簡留直衛者五百



里為七番千里八番二千里十番外為十二番亦月上

案三代以下軍制唐府兵為最善杜典於立軍下雖附今制一門而府兵之制未詳今補纂

宋立禁軍廂軍分隸殿前侍衛總管司而籍藏樞密院凡召募廩給訓練屯戍選補之政皆樞密院掌之禁軍者天子之衛兵也以守京師備征戍總於殿前侍衛二司其尤親近扈從者號班直殿前侍衛二司各關所掌兵揀其驍勇升為上軍老弱怯懦置剩員以處之廂軍者諸州之鎮兵也建隆初詔選州兵壯勇者悉部送京

欽定四庫全書

金史卷九十二

師以備禁衛餘留本城以給役使又選彊壯卒定為兵樣分送諸道召募教習俟其精練即送闕下復立更戌法分遣禁旅戍守邊城使往來道路以習勤苦均勞佚自是將不得專其兵而士卒不至於驕惰矣

遼太祖以德呼部受禪析本部為五院六院統以皇族而親衛缺然乃立鄂爾多法分州縣籍戶丁以建宮衛宏義宮騎軍六千長寧宮騎軍五千永興宮騎軍五千積慶宮騎軍八千延昌宮騎軍二千彰愍宮騎軍一萬

崇德宮騎軍一萬興聖宮騎軍五千延慶宮騎軍一萬  
太和宮騎軍一萬五千永昌宮騎軍一萬敦睦宮騎軍  
五千文忠王府騎軍一萬十二宮一府自上京至南京  
總要之地各置提轄司重地每宮皆置內地一二而已  
入則居守出則扈從有兵事則五京二州各提轄司傳  
檄而集不待調發州縣部族十萬騎軍已立具矣民年  
十五以上五十以下隸兵籍每正軍一名馬三匹打草  
穀守營鋪家丁各一人人鐵甲九事馬韉轡馬甲皮鐵

視其力弓四箭四百長短槍鎗鎗斧鉞小旗鎚錐火刀  
石馬孟鈔一斗鈔袋搭鈔傘各一縻馬繩二百尺皆自  
備

金初諸部之民無他徭役壯者皆兵平居則佃漁射獵  
習為勞事有警則下令部內及遣使詣諸貝勒徵兵凡  
步騎之仗糗皆取備焉其部長曰貝勒行兵則稱曰明  
安穆昆從其多寡以為號明安者千夫長也穆昆者百  
夫長也穆昆之副曰富埒琿士卒之副從曰伊勒希太

祖收國二年以兵二千五百破耶律色實始命以三百  
戶為穆昆穆昆十為明安繼而諸部來降率用明安穆  
昆之名以授其首領而部伍其人出河之戰兵始滿萬  
而遼莫敵矣及來流鴨水鐵驪布古德之民皆附東京  
既平山西繼定內收遼漢之降卒外籍部族之健士以  
北部百三十戶為一穆昆諸州漢人六十五戶為一穆  
昆親信之臣並領所部為明安世宗以上京地廣而腴  
出府庫錢以濟行資牛蓄遷率瑣一明安和囉噶二明

安二十四穆昆以實之多易置河北山東所屯之舊括民地而為之業戶頒牛而使之耕畜甲兵而為之備乃大重其權授諸王以明安之號或新置者特賜之名制其奢靡禁其飲酒習其騎射儲其糧糒其備至嚴也

元世祖立五衛以總宿衛諸軍衛設親軍都指揮使外則萬戶之下置總管千戶之下置總把百戶之下置彈壓立樞密院以統之初有蒙古軍特默齊軍蒙古軍皆國人特默齊軍則諸部族也男子年十五以上七十以

下盡簽為兵十人為一牌設牌頭上馬則備戰鬪下馬則屯聚牧養孩幼稍長又籍之曰漸丁軍既平中原發民為卒是為漢軍限年二十以上者充其繼得宋兵號新附軍又有遼東之乂軍契丹軍女直軍雲南之寸白軍福建之畬軍則皆不出戍他方者蓋鄉兵也又有以技名者曰砲軍弩軍水手軍應募而集者曰達爾罕軍明初自京師達於郡縣皆立衛所外統之都司內統於五軍都督府而上十二衛為天子親軍者不與馬征伐

則命將充總兵官調衛所軍領之既旋則將上所佩印  
官軍各回衛所京軍設三大營一曰五軍一曰三千一  
曰神機居常五軍肆營陣三千肆巡哨神機肆火器大  
駕征行則大營居中五營分駐步內騎外騎外為神機  
神機外為長圍周二十里樵採其中自成祖至宣宗皆  
以京營制勝焉景帝時兵部尚書于謙建議以三大營  
各為教令臨期調撥兵將不相習乃請於諸管選勝兵  
十萬分十營團練每營都督一號頭官一都指揮二把



總十領隊一百管隊二百於三營提督中推一人充總兵官以兵部尚書或都御史一人為提督出征即令原都督等統領之

### 論將

唐李勣統兵與李靖合攻突厥勣曰頡利得度磧保九姓卒難以定若約齊薄之不戰可縛矣靖從之率衆夜發勣先勒兵屯磧口頡利奔不能度遂降太宗曰煬帝不擇人守邊築長城以勞中國我用勣守并突厥不敢

南賢於長城遠矣又太宗征遼薛仁貴著白衣自標幟持戟腰鞬兩弓所向披靡敵遂奔潰帝召仁貴曰舊將皆老欲擢驍勇付闔外莫如卿者吾不喜得遼東喜得虢將遷右領軍中郎將後以罪除名未幾拜代州都督率兵擊突厥突厥問唐將為誰曰薛仁貴突厥曰薛將軍流象州死矣安得復生仁貴脫兜鍪見之突厥相視失色皆下馬羅拜

宋范仲淹知延州先是詔分邊兵令諸將領之寇至則

官卑者先出仲淹曰將不擇人以官為序致敗之道也  
於是大閱州兵得萬八千人分六將領之日夜訓練分  
番禦敵元昊聞之相戒勿犯

金宗弼再伐江南以酈瓊素知南方山川險易召至軍  
計事瓊從容語同列曰瓊嘗從大軍南伐每見元帥  
國王親臨陣督戰矢石交集而王指麾三軍意氣自若  
用兵制勝皆與孫吳合可謂命世雄材矣至於親冒鋒  
鏑進不避難將士視之孰敢愛死宜其所向無前日闢

國千里也江南諸帥才能不及中人每當用兵必身居數百里外謂之持重或督召軍旅易置將校僅以一介之士持虛文諭之謂之調發制敵決勝委之偏裨是以智者解體愚者喪師幸一小捷則露布飛馳增加俘級以為己功斂怨將士縱或親臨亦必先遁何能整軍而經武耶衆以為確論

明章溢侍太祖因問征閩諸將對曰湯和由海道進胡廷瑞自江西入此可必勝然閩中尤服李文忠威信若

令文忠由浦城取建寧此尤萬全計也太祖喜立詔文  
忠督師閩中

搜才附

唐李筌太白陰經曰有深沉謀慮出人意表者名曰智  
囊之士有辭縱理橫飛箝捭闔能移人之性奪人之心  
者名曰說辯之士有得敵國君臣門閭請謁之情者名  
曰間諜之士有知山泉水井次舍道路迂直者名曰鄉  
導之士有制造五兵攻守利器奇變譎詭者名曰伎巧

之士有引五石之弓矢貫重鎧戈矛劍鉞便於利用陸  
搏犀兕水攫龜鼉跳身捕敵擐旗撫鼓者名曰猛毅之  
士有立乘奔馬左右超忽踰越城堡出入廬舍而無形  
迹者名曰趨捷之士有往返三百里不及夕者名曰疾  
足之士有力負三百六十斤行五十步者名曰巨力之  
士有步五行運三式多言天道詭說陰陽者名曰伎術  
之士

宋許洞虎鈴經曰今之取人率求其多學而舍其偏技

非良術也兵家所利隨其短長用之也精銳者使鬪果  
敢者使攻沉毅而性執者使據阻險輕捷者使誘敵剛  
愎者使當鋒利口喋喋者使用間善竊者使盜號探敵  
惡言者使揚毀詈罵奇才異識者使預談論深識大度  
者使安衆志屈強多力者使斬關搥莽善隨地形結構  
者使度樹營柵諳山澤高下水泉之利者使詳地形妖  
言詐辭善張皇鬼神推行天命者使揚聲惑衆以動敵  
心善擇地勢平險知往來細大之蹊路者使通儲糧奇

辭偉辯能駕虛矜大者使奮振威德耳目聰明善探敵情者使伺候奸偽敏才健筆者使主牋檄明七曜休咎者為歷數之士善占風雲氣候者為候風氣之士曉六壬遁甲者為選日之士善著龜者為卜筮之士人醫須二十以上以兵數增之獸醫亦如人醫之數大將軍推通材者與之參議可否故我大衆之內無棄人焉人無所棄斯動則有功矣

明金幼孜北征錄曰正兵之外復收諸色材技分為二



十八將一辭說將招善游談辯說者充一間諜將招善探聽事務者充一鄉導將招曾歷內外道路者充一伏兵將招善搜伏隱路者充一營寨將招善辨形驗勢者充一聽望將招耳聾目瞽者充

聾者專於望  
瞽者專於聽

一偷刼將

招善攻營襲寨者充一潛身將招善無火夜行者充一輕捷將招善上竿立索者充一樓閣將招善緣牆上壁者充一窟穴將招善穿窟穴者充一烟火將招善飛烟走炮者充一毒藥將招善修合藥餌者充一醫人將招

善醫人病者充一醫馬將招善醫馬病者充一波濤將  
招善弄潮泛水者充一洋海將招識海道者充一風雲  
將招善辨風驗雲者充一孤虛將招善鑽龜揲易六壬  
太乙者充一遊獵將招善羅弋禽獸籠檻教使者充一  
鋒刃將招善煉鋼團鐵者充一觚角將招善製弓弩者  
充一皮革將招善薰皮雙線者充一樓櫓將招善斤斧  
繩墨者充一油漆將招善煎油髹漆者充一機杼將招  
善機織錦羅者充一丹青將招善揮染繪畫者充一機

巧將招善雕鎬裝塑者充二十八將各置隊伍教以本

色材伎無習武藝戰鬪

案龍韜太公曰凡舉兵師以將為命命在通達不守一術因能

授職各處所長隨時變化以為紀綱故將有股肱羽翼  
七十二人以應天道腹心一人主贊謀應卒揆天消變  
總攬計謀保全民命謀士五人主圖安危慮未萌論行  
能明賞罰授官位決嫌疑定可否天文三人主司星歷  
候風氣推時日考符驗校災異知天心去就之機地理  
三人主軍行止形勢利害消息遠近險易水涸山阻不  
失地利兵法九人主講論異同行事成敗簡練兵器刺  
舉非法通糧四人主度飲食備蓄積通糧道致五穀令  
三軍不因乏奮威四人主擇才力論兵革風馳電掣不  
知所由伏旗鼓三人主伏旗鼓明耳目詭符印謬號令  
聞忽往來出入若神股肱四人主任重持難修溝塹治  
壁壘以備守禦通才二人主拾遺補過應對賓客論議

談語消患解結權士三人主行奇譎設殊異非人所議  
行無窮之變耳目七人主往來聽言觀變覽四方之事  
軍中之情爪牙五人主揚威武激勵三軍使冒難攻銳  
無所疑慮羽翼四人主揚名譽震遠方動四境以弱敵  
心遊士八人主伺奸候變開闔人情觀敵之意以為間  
謀術士二人主為譎詐依託鬼神以惑衆心方士三人  
主百藥以治金瘡以痊萬病法筭二人主會計三軍營  
壘糧食財用出入太公之需才如此使非旁搜博採何  
由備用哉搜才之法談兵家多言之者而其目  
莫詳於太白陰經虎鈴經北征錄故備載之

欽定續通典卷九十二

欽定四庫全書

欽定續通典卷九十三

兵

法制

唐貞觀初練兵之制每歲季冬折衝都尉率五校兵馬之在府者分步隊騎隊左右相距百步各執稍幡及旗擊鼓則進聞金則却以吹角始以吹角止因縱獵獲各入其人至開元中以仲冬月講武前期所司于都門外

除地為塲為和門墀地為營坪立表為進退之節至日將士集依方色建旗東西成列吹角三通聽誓於大將軍鼓鳴旗舉士衆趨進東軍鼓而舉青旗為直陣西軍亦鼓而舉白旗為方陣以應之次西軍鼓而舉赤旗為銳陣東軍亦鼓而舉黑旗為曲陣以應之次東軍鼓而舉黃旗為圓陣西軍亦鼓而舉青旗為直陣以應之次西軍鼓而舉白旗為方陣東軍亦鼓而舉赤旗為銳陣以應之次東軍鼓而舉黑旗為曲陣西軍亦鼓而舉黃

旗為圓陣以應之凡陣遞為主客先舉為客後舉為主  
五變而畢事步軍畢乃講騎軍進止如之後詔府兵六  
歲一簡自曠騎羽林之軍設擇材勇者頗習弩射亦以  
試士及第者有賞元宗講武驪山以虧失軍客詔斬兵  
部尚書郭元振坐之纛下宰相跪諫曰元振推戴上皇  
有大功得免死流新州禮儀使唐紹草軍儀有失斬之  
諸軍震恐失序惟薛訥解琬軍不動帝召至慰勞又李  
光弼代郭子儀鎮朔方麾幟仍舊號令一新會帥兵東

出大將張用濟稍逗遛立斬之諸將畏服用命

五代漢將史弘肇御衆嚴整將校少不從命即搃殺之  
士卒犯民田及繫馬于樹者皆斬軍中畏服

周世宗與北漢戰右軍樊愛能何徽引騎兵先遁世宗  
親冒矢石擊敵却之歸即收愛能徽及軍士七十餘人  
責之曰汝輩非不能戰正欲以朕為奇貨賣與劉崇耳  
悉斬之將士股栗所至克捷

宋初殿前侍衛二司各閱所掌兵健勇者升上軍怯弱



者為剽員並詔諸州長吏精練部兵送闕下仍日習之  
習法以鼓聲為節騎兵五習步兵四習閱陣畢令解鎧  
以弓弩射營製弓三等自一石至八斗弩四等自二石  
八斗至二石五斗以次閱習騎兵只射九斗至七斗弓  
畫的五暈去的二十步引滿發中者視暈數論賞騎兵  
帶甲射不能發矢者奪所乘馬與本營藝優士卒後又  
立挽強蹠硬射格以春秋大教弓射夏三月祇習短兵  
咸平中閱侍衛兵二十萬於東武村步騎交屬左右相

向都指揮執方旗以節進退使人于兩陣中執旗登候  
臺應之初舉黃旗諸軍旅拜次舉赤旗則騎進舉青旗  
則步進旗動鼓作諸軍士皆三挑而後退次舉白旗諸  
軍復拜遂舉黑旗以振旅軍于左者畧右陣右者畧左  
陣而還熙寧五年以蔡挺衙教陣法頒諸路五伍為隊  
五隊為陣陣橫列騎兵二隊亦五伍列之束草為人射  
馬中者有賞馬步軍皆前三行槍刀後二行弓弩隊中  
附虎蹲弩床子弩各一具射與擊刺迭出以鼓為節聞

金即退其人馬強者預隱隊中遇有用處則別出為奇  
南渡後專習制禦鐵騎推鋒破敵之法習全副執帶出  
入短檣神臂弓長柄膊刀馬射穿甲施用棍棒每營揀  
二十人閱習放砲排日就營教閱每軍各置旗號前軍緋  
旗鳥為號後軍皂旗龜為號左軍青旗蛟為號右軍白  
旗虎為號中軍黃旗神人為號又別以五色物號制招  
旗分旗舉招旗則五軍以旗相應合而成陣舉分旗則  
五軍以旗相應分而成隊左右前却或分藏為伏或分

出為奇皆舉旗為號更鳴小金應鼓備瞻望不及者預約伏藏之所緩鳴小金即止急鳴應鼓即奇兵出陣趨戰急鳴小金即伏兵盡出其春秋大校皆依此法乾道四年十月大閱于茅灘教場先期修築將壇至日三衙管軍與各軍統制統領將佐全裝披帶率三司馬步軍兩忠毅軍寨馬軍各執弓槍帶刀斧齊集視黃旗舉中軍鳴角馬步軍簇隊連三鼓馬軍上馬步人撮起旗槍四鼓舉白旗中軍鼓聲應變方陣為備敵之形別高一

鼓步軍四向如遇敵且戰且前馬軍出陣如交關再高一鼓各分歸本位五鼓舉黃旗變圓陣如自環固又三鼓舉赤旗變銳陣魚貫斜列如衝敵再舉青旗變直陣中間節次皆如方陣鳴金收隊重三鼓馬軍上馬步人蹴落擊刺中節仍鳴角簇隊步人分東西引拽馬軍交頭隨隊呈試驍銳大刀繼而進試車砲烟槍各藝訖鳴金收軍先是熙寧中趙高言大閱陣隊且以萬二千五百人為法旌旗麾幟各隨方色仍依唐李靖結隊之式

稍為變動每一大隊合五中隊五十人為之中隊合三  
小隊九人為之小隊合三人為之皆令自擇其心意相  
得者又選壯勇善槍者一人為旗頭令自擇如己藝心  
相得者二人為左右儻自選勇悍者一人為引戰選軍  
校一人執刀在後為擁隊凡隊內一人用命二人應援  
小隊用命中隊應援中隊用命大隊應援大隊用命小  
隊應援如觀望不赴救致有失者本隊委擁軍校次隊  
委本轄校將審勘所由斬之其不可救與不能救者不

坐用法精密後用張誠一李憲等效李靖六花陣法教  
演七軍曰營曰陣止為營行為陣營則正陣則奇至淳  
熙間又立槍手射鐵簾賞格槍手以竄刺多少為十二等  
支銀兩高下有差射鐵簾以步數遠近犒賞緡錢有差  
又岳飛討楊么統制任士安不稟前帥令致軍無功鞭  
之使餌賊曰三日賊不平斬汝乃挑賊併攻伏兵四起  
擊賊走之孟宗政權棗陽軍初視事一愛僕犯新令立  
斬之軍民股栗孟珙以元兵至三川下令應出戍主兵

官不許失棄寸土權開州梁棟以乏糧還司珙曰是棄城也斬以徇由是諸將稟命惟謹

遼制鑄金魚符調發軍馬其捉馬及傳命有銀牌二百軍所舍有遠探欄子馬以夜聽人馬之聲凡舉兵帝率羣臣祭告天地日神分命近臣告太祖以下諸陵及木葉山神乃詔諸道徵兵惟南北奚王東京渤海兵馬燕京統軍兵馬雖奉詔未敢發兵必以聞上遣大將持金魚符合然後行始聞詔攢戶丁推戶力覈籍齊衆以待



自十將以上次第點集軍馬器仗符至兵馬本司自領  
使者不得與惟再共點軍馬訖又以上聞量兵馬多少  
再命使充軍主與本司互相監督又請引五方旗鼓然  
後皇帝親點將校選士卒其南伐點兵多在幽州北千  
里駕鵞泊及行並取居庸關曹王峪白馬口古北口阿  
達木口松亭關榆關等路將至平州幽州境又遣使分  
道催發不得久駐恐踐禾稼出兵不過九月還師不過  
十二月皇帝親征留親王一人在幽州權知軍國大事

既入南界分為三路廣信軍雄州權知各一駕必由中道兵馬都統護駕等軍皆從各路軍馬遇縣鎮即時攻擊若大州軍必先料其虛實可攻次第而後進兵至宋北京三路兵皆會以議攻取及退亦然三路軍馬前後左右有先鋒遠探欄子馬各十數人在先鋒前後二十餘里全副衣甲夜中每行十里或五里少駐下馬側聽有無人馬之聲有則擒之力不可敵飛報先鋒齊力攻擊如有大軍走報主帥敵中虛實動必知之軍行當道

州城防守堅固不可攻擊引兵過之恐敵人出城邀阻  
乃圍射鼓譟詐為攻擊敵方閉城固守前後無阻引兵  
進分兵抄截使隨處州城隔絕不通孤立無援所過大  
小州城至夜恐城中出兵突擊及與鄰州計會軍馬甲  
夜每城以騎兵百人去城門左右百餘步被甲執兵立  
馬以待兵出力不能加馳還勾集衆兵與戰左右官道  
斜徑山路河津夜中並遣兵巡守其打草穀家丁各夜  
甲持兵旋團為隊必先砍伐園林然後運土木填濠塹

又於本國州縣起漢人鄉兵萬人隨軍專伐園林填道路御寨及諸營壘惟用桑柘梨栗軍退縱火焚之敵軍既陣料其陣勢小大山川形勢往回道路救援捷徑漕運所出各有以制之然後于陣四面列騎為隊每隊五百人十隊為一道十道當一面各有主帥最先一隊走馬大譟衝突敵陣得利則諸隊齊進若未利引退第二隊繼之退者息馬飲水諸道皆然更退迭進敵陣不動亦不力戰歷二三日待其困憊又令打草穀家丁馬

施雙帚因風疾馳揚塵敵陣更互往來敵旣飢疲目不相覩可以取勝若陣南獲勝陣北失利主將在中無以知之則以本國四方山川為號聲以相聞得相救應若帝不親征重臣統兵不下十五萬衆三路往還北京會兵進以九月退以十二月行事次第皆如之若春以正月秋以九月不命都統止遣騎兵六萬不許深入不攻城池不伐林木但於界外三百里內耗蕩生聚不令種養而已軍入南界步騎車帳不循阡陌三道將領各一

人率欄子馬各萬騎支散游奕百十里外更迭覘邏及暮以吹角為號衆即頻舍環繞御帳自近及遠折木稍屈為弓子鋪不設槍營塹柵之備每軍行鼓三伐不問晝夜大衆齊發未遇大敵不乘戰馬俟近敵乘新羈馬蹄有餘力成列不戰退則乘之多伏兵斷糧道冒夜舉火上風曳柴饋餉自賫散而復聚善戰耐寒此兵之所以強也準布達爾罕叛命耶律仁先為西北路招討使許便宜從事仁先嚴斥堠扼敵衝懷柔服從庶事整飭

達爾罕來寇仁先擊敗之

金用兵之制戈為前行號曰硬軍弓矢在後設而不發  
非五十步不射弓力不過七斗箭鏃至六七寸形如鑿  
入輒不可出人攜不滿百隊伍之法五十百千皆有長  
五長擊柝十長執旗百長挾鼓千長則旗幟金鼓悉備  
五長戰死四人皆斬十長戰死五長皆斬百長戰死十  
長皆斬凡為將自執旗人視其所向而趨自主帥至步  
卒皆自馭無從者國有大事適野環坐畫灰而議自卑

者始議畢即漫滅之人不聞聲其密如此將行軍大會而飲使人人獻策主帥聽而擇焉其合者即為將任其事師還又大會問有功高下賞之以金若干舉以示眾或以為薄復增之初盛之時率用騎兵旗幟之外各有字記大小牌子繫馬上為號每五十人分為一隊前二十人全裝重甲持棍槍後三十人輕甲操戈每遇敵必有一二人躍馬而出先覘陣之虛實或向其左右前後結隊而馳擊之百步之內弓矢齊發中者常多勝則整



隊而緩追敗則復聚而不散其分合出入應變若神兵之所以強也太祖命舍音都統內外諸軍取遼中京詔曰遼政不綱神人共棄今欲中外一統故命汝率大軍以行討伐爾其慎重兵事擇用善謀賞罰必行糧餉必繼勿擾降服勿縱俘掠見可而進毋淹師期事有從權無煩奏稟舍音遂克中京又烏珠臨敵被白袍乘甲馬以牙兵三千督戰兵皆重鎧甲號鐵浮圖戴鐵兜牟周匝綴長簷三人為伍貫以韋索每進一步即用拒馬擁

之人進一步拒馬亦進退不可却又以鐵騎分左右翼號拐子馬皆女直為之號長勝軍專以攻堅戰酣然後用之所向無前屢建奇績

明太祖洪武六年命中書省大都督府御史臺六部議教練軍士律騎卒必善馳射槍刀步兵必善弓弩槍步射以十二矢之半遠可到近可中為程遠可到將弁百六十步軍士百二十步近可中五十步設弩以十二矢之五遠可到蹶張八十步划車六十步槍必進退熟習

在京衛所以五千人為率取其一指揮以下官領赴御  
前驗試餘以次番試在外都司衛所每衛五千人取五  
之一千戶以下官領赴京驗試餘以次番試軍士步騎  
皆善將領各以其能受賞否則軍士給錢六百為道里  
費將領自指揮使以下所統軍士三分至六分不中者  
次第奪俸七分以上次第降官至為軍止都指揮軍士  
四分以上不中奪俸一年六分以上罷職李文忠下錢  
塘入宿城上秋毫無犯令曰敢擅入民居者斬一卒偕

民釜立磔以徇又韓雍征廣西徭酋兼程而進一入軍  
先斬失律指揮李英等四人將士股慄壁壘改觀卒滅  
大藤諸賊又梁震為大同鎮總兵大同鎮兵素驕悍鎮  
巡官畏禍每甘言煦之稍不如意即反脣瞪目飛章訛  
語相搖惑震受命率家丁五百人馳至雲中申明約束  
曰我無爾凌爾無我叛王法軍令具在我不敢破紀綱  
誤國家家丁時時向鎮兵語曰爾敢犯主將者恃衆耳  
兒郎輩無不一以當百五步之內恐爾不得用其衆矣鎮

兵由是歛戢

雜教令附

唐李荃太白陰經曰夫人以心定言定言以出令故須振雄畧出勁詞銳鐵石之心凜風霜之氣發揮號令申明軍法經曰師衆以順為武軍事有死無犯為敬故穰苴斬莊賈魏絳戮楊干而名聞諸侯威震鄰國令之不行不可以稱兵三令而不如法者吏士之罪也申明而不嚴整者將之過也先甲三日懸令于軍門使軍正執

木宣于六軍之衆有犯令者使軍正準令按集軍人而後行刑使六軍皆知之

宋制賞格凡臨陣對賊矢石未交先鋒馳入陷陣突衆賊徒因而破敗者為奇功或寇賊堅銳城池險固山林阻隘道路遙遠及救兵不繼如此之類既制勝克敵難易相遠並不可以常格酬叙委主將臨時錄奏旌賞

明制令凡交鋒之際突入敵陣透出其背殺敗敵衆者勇敢入陣斬將搃旗者本隊已敗敵衆別隊勝負未決

而能救援克敵者受命能任其事出奇破敵成功者皆為奇功齊力進前者首先敗敵者前隊交鋒未決後隊向前殺敗敵衆者皆為頭功凡建立奇功頭功者其親管頭目即為報知妄報者治以重罪行營及下營之時擒獲姦細者陞賞准頭功哨馬生擒敵一人賞銀三十兩斬首一級者二十兩

欽定續通典卷九十三



欽定四庫全書

史部

欽定續通典卷九十四

詳校官監察御史臣曹錫寶

洗馬臣王坦修覆勘

校對官編修臣周厚轅

謄錄監生臣李載文

欽定四庫全書

欽定續通典卷九十四

兵

料敵制勝

唐高祖遣李密出關長史張竇德言其必叛乃敕密更受節度密曰無故召還恐無生理遂斬使者入桃林縣驅掠徒衆直趨南山乘險而東使人馳告故將伊川刺史張善相令以兵應接而聲言向洛行軍總管盛彥師

聞之率衆躡熊耳山南據要道令其衆夾路而伏諭之曰俟賊半渡一時俱發或曰聞密欲向洛而公入山何也彥師曰密聲言向洛實欲出不意走襄城就張善相耳若賊入谷我後追之山路險隘一夫殿後必不能制今吾得先入谷擒之必矣密果南出半渡彥師擊斬之傳首長安又太宗征高麗至元菟高麗大駭城邑皆閉車駕次安市高麗北部僞薩高延壽帥兵十五萬來援上謂諸將曰今為延壽策有三引兵直前連城為壘據

險食粟掠吾牛馬攻之不可猝下欲歸則泥潦為阻坐  
困吾軍上策也拔城中之衆與之宵遁中策也不度智  
能來與吾戰下策也卿曹觀之彼必出下策成擒在吾  
目中矣後延壽果敗舉衆降又唐休璟在邊遇吐蕃大  
將麴莽布支率騎數萬寇涼州休璟以兵數千臨高望  
之見賊旗鎧鮮明謂麾下曰莽布支新將兵欲以示武  
耳然其下皆貴臣子弟不習戰請為君破之乃披甲先  
登六戰皆克又李光弼圍安太清於懷州因史思明來

救壁野水渡比暮還軍留雍希顥守曰賊將高暉李曰  
越萬人敵也必令劫我爾留此賊至勿與戰若降與偕  
來是日思明果召曰越曰光弼野次爾以鐵騎五百夜  
取之不然無歸日越至壘問曰太尉在乎曰去矣曰兵  
幾何曰千人曰將為誰曰雍希顥日越謂其下曰我受  
命云何今獲希顥歸不免死遂請降希顥與俱至光弼  
厚待之表授大將高暉亦降或問公降二將何易也光  
弼曰思明再敗聞我野次彼固易之命將來襲必許以

死希顥無名不足以爲功日越懼死不降何待高暉材  
出日越之右降者見遇貳者得不思奮乎嗣由地道攻  
城俘安太清以獻又李晟討朱泚之亂引兵叩都門會  
諸將圖所向衆對先拔外城然後清宮晟曰外城有里  
閘之隘若設伏格戰居人囂潰非計也賊重兵精甲聚  
苑中今直擊之是披其心腹將圖走不暇諸將曰善乃  
自東渭橋移壁光泰門以薄都城連溝柵而賊將張廋  
芝李希倩求戰晟顧曰賊不出是吾憂也今乃冒死來

天誘之矣勒吳詵等縱兵鏖擊晟以精騎鼓譟而從大破之乘勝入光泰門再戰賊却走又楊朝晟為邠寧節度使請城方渠合道木波以遏吐蕃要路詔問須兵幾何對曰邠寧兵足以城之帝曰嚮城鹽州用兵七萬今三城尤逼敵境何易邪對曰今發本鎮兵不旬日至出其不意而城之敵謂吾衆不減七萬不敢輕來不過三旬吾城已畢敵雖至城旁草盡不能久留敵退則運芻糧實之此萬全策也若大集諸道兵踰月始至敵亦集

衆來與我爭戰何暇築城哉帝從之朝晟分軍為三各  
築一城三旬三城成朝晟軍還至馬嶺吐蕃始出追之  
相距數日而去朝晟遂城馬嶺而還開地三百里皆如  
其策

五代梁攻鄆州朱瑾來救梁諸將或勸太祖縱瑾入鄆  
耗其食堅壁勿戰此可以俱弊太祖曰瑾來必與時溥  
俱不若遣霍存邀之存伏兵蕭縣已而瑾果與溥俱出  
迷離存發伏擊之遂敗瑾等於石佛山



晉兵圍張文禮于鎮州久不下而定州王都引契丹來  
侵契丹至新樂晉人皆恐欲解圍去莊宗未決郭崇韜  
曰契丹之來非救文禮為王都以利誘之耳且晉新破  
梁軍宜乘已振之勢不可遽自退怯莊宗然之果敗契  
丹又莊宗既定魏州梁將劉鄩軍於洹水時張源德據  
貝州魏人請先擊貝州然後東出師循地滄海莊宗曰  
貝州魏之邊郡壁壘完堅源德託附劉鄩勢難卒解德  
州西接貝州與滄帥共為首尾昨偵其無備可以輕騎

取之若在彼駐軍二賊自然勢解各保孤城然後進擊  
於是遣騎軍晝夜兼行襲德州郡將不意師至踰垣而  
遁遂克其城又莊宗聞梁人欲大舉數道入寇深以為  
憂召諸將會議郭崇韜對曰臣嘗細詢康延孝以河南  
之事度已料彼日夜思之成敗之機決在今歲梁今悉  
以精兵授段凝決河自固恃此不復為備凝非將材不  
足畏降者皆言大梁無兵陛下若留兵守魏固保楊劉  
自以精兵與鄆州合勢長驅入汴為主授首則諸將自

降矣莊宗意乃決濟河至鄆州中夜進軍以李嗣源為前鋒遇梁兵連破之擒王彥章莊宗謂諸將曰段凝猶在河上何向而可諸將以為東方諸鎮兵皆在段凝麾下所餘空城耳以天威臨之無不下者若先廣地東傳於海然後觀釁而動可以萬全康延孝固請亟取大梁嗣源曰今彥章就擒段凝必未之知就使有人走告之疑信之間尚須三日設若知吾所向即發救兵直路則阻決河須自白馬南渡舟楫亦難猝辦此去大梁至近

無險信宿可至段凝未離河上友貞已為吾擒矣延孝之言是也莊宗從之遂滅梁

周太祖因劉旻攻晉州遣王峻將兵討之峻軍出自絳州前鋒報過蒙阮峻喜謂其屬曰蒙阮晉絳之險也旻不分兵扼之使吾過此可以知其必敗也峻軍去晉州一舍旻聞周兵大至即解去

宋太祖謀伐蜀遣王全斌由鳳州劉光儀由歸州進光儀將行太祖示以地圖指鎖江曰我軍至此汭流而上

慎勿以舟師爭勝當先以步騎陸行出其不意擊之俟其勢却即以戰棹夾攻取之必矣及師至夔距鎖江三十里舍舟前進先奪浮梁復牽舟而上蜀監軍武守謙領麾下與光儀騎將張廷翰戰敗遂入寧江城守將高彥儔自焚死又曹彬潘美諸將北伐陞辭太宗謂曰潘美但先趨雲應卿等以十萬衆聲言取幽州且持重緩行不得貪利敵聞我兵至必悉衆救范陽不暇援山後矣後彬違詔致敗又景德時劉永規知宜州在郡嚴酷

衆咸怨焉澄海軍校陳進率所部害永規擁判官盧成  
鈞為謀主嬰城拒命詔東上閤門使曹利用等發兵討  
之初奏至真宗謂王旦等曰司天屢言當有兵方憂遠  
地牧守不得其人今果有是當遣使翦除旦言利用精  
於方畧悉心王事此賊不過保其家屬據城拒守或掠  
城中貲以趨山林如此不足為慮若選募驍勇立謀主  
直趨廣州彼其智識必不及此猶慮為人誘教爾及聞  
賊分據柳州洛容縣帝曰此不能離窟穴枉自棄耳不

久遂平又王韶以龍圖閣待制知熙州入朝會轄戢敗景思立於踏白城圍河州甚急韶自京師還至興平聞之乃日夜馳至熙州熙方守城命撤之選兵得二萬議所向諸將欲趨河州韶曰賊所以圍城者恃有外援也今知救至必設伏待戰且新勝氣銳未可與爭當出其不意以攻其所恃此所謂扼吭擣虛形格勢禁則自為解者也乃直叩定羌城破結和爾族斷夏國通路進臨寧河分命偏將入南山轄戢知援絕拔柵去又章榘知

慶州時朝廷戢兵戒邊吏勿妄動崇言夏人嗜利畏威  
不有懲艾邊不得休息宜稍取其疆土如古削地之制  
以固吾圉然後諸路出兵擇據要害不一再舉勢將自  
威矣遂乘便出討以致其師夏果入圍環州崇諜知之  
遣驍將伏兵洪德城夏師過之鼓譟而出斬獲甚衆又  
孟珙少時從父宗政在襄金人攻襄珙料其必窺樊城  
乃獻策宗政由羅家渡濟河宗政然之翼日諸軍臨渡  
布陣金人果至渡伏發大敗之又趙范趙葵擊李全於



揚州全敗走范葵議所向葵曰出東門范曰西出嘗不利賊必見易因其所易而圖之必勝乃悉精銳數千而西取官軍素為賊所易者張其旗幟以誑之全望見喜直前突鬪范麾兵並進葵親搏戰諸軍爭奮賊始疑非前日軍欲走入土城李虎軍已塞其甕門全窘從數十騎北走追及刺殺之

遼耶律烏魯斯與晉將杜重威戰於望都被圍衆言陣薄處可出烏魯斯曰恐彼有他備竟引兵衝堅而出迴

視衆所指處皆大塹也其料敵多此類

金太祖將舉兵伐遼問都古魯納曰遼名為大國其實  
空虛主驕而士怯戰陣無勇可取也吾欲舉兵仗義而  
西君以為何如都古魯納曰以主公英武士衆樂為用  
遼主荒於畋獵政令無常易與也太祖從之卒滅遼又  
薩里哈因宋吳玠擁重兵據涇州涇原以西多應之欲  
退守京兆侯河南河東軍古英曰我退守吳玠必取鳳  
翔京兆同華據潼關吾屬無類矣不如速戰我軍陣涇

之南原宋兵必自西原來古英與希卜蘇各以選騎五百摧其兩翼元帥當其中擊之可以得志監軍巴爾斯曰二子當其左右巴爾斯願當其中元帥據岡阜多張旗幟為疑兵可以得志薩里哈從之吳玠兵果自西原來古英希卜蘇擊其左右自旦至午吳玠左右軍少退巴爾斯當其前衝擊之遂敗玠軍自此蜀人不敢復出關陝遂定

元太祖諭諸將曰金精兵在潼關南據連山北限大河

難以遽破若假道於宋宋金世讎必能許我則下兵唐  
鄧直搗大梁金急必徵兵潼關然以數萬之衆千里赴  
援人馬疲弊雖至弗能戰破之必矣又郭侃從宗王實  
喇烏克西征至密實勒會日暮已休復驅兵起祇留數  
病卒西行十餘里頓軍令軍中銜枚轉箭敵不知也潛  
兵夜來襲殺病卒克釁蘇勒坦大驚曰東天將軍神人  
也遂降後世祖即位侃上疏陳平宋之策其畧曰宋據  
東南以吳越為家其要地則荆襄而已今日之計當先

取襄陽既克襄陽彼揚廬諸城彈丸地耳置之勿顧而直趨臨安疾雷不及掩耳江淮巴蜀不攻自平後皆如其策又中統元年哈喇布哈琿塔哈據六盤山以兵應額呼布格商挺謂廉希憲曰為六盤有三策悉銳而東直擣京兆上策也聚兵六盤觀釁而動中策也重裝北歸以應和林下策也希憲曰彼將何從挺曰必出下策已而果然於是令巴沁汪良臣發兵禦之六盤之兵既北而阿勒達爾自和林引兵南來與哈喇布哈琿塔哈

遇於甘州哈喇布哈以語不合引其兵北去阿勒達爾  
遂與琿塔哈合軍而南時諸王哈丹率騎兵與巴沁汪  
良臣兵合乃分為三道以拒之大戰於甘州東殺阿勒  
達爾琿塔哈事聞帝大悅曰商孟卿古之良將也

明劉基初見太祖太祖問征取計基曰士誠自守奴不  
足慮友諒劫主脅下名號不正地據上流其心無日忘  
我宜先圖之陳氏滅張氏勢孤一舉可定然後北向中  
原王業可成也太祖大悅會友諒陷太平謀東下勢甚

張諸將或議降或議奔據鍾山太祖召基入內基奮曰  
主降及奔者可斬也太祖曰計安出基曰賊驕矣待其  
深入伏兵邀取之易耳天道後舉者勝取威制勝以成  
王業在此舉矣太祖用其策誘友諒至大破之又常遇  
春因陳友諒來援安慶料其必攻池州乃伏銳士於九  
華山敵果來攻伏起擒斬萬餘人又張士誠攻新城李  
文忠帥朱亮祖等馳救去新城十里而軍胡德濟使人  
告賊勢方盛宜少駐以俟大軍文忠曰兵在謀不在衆

乃下令曰彼衆而驕吾少而銳以銳遇驕何憂不克彼  
軍輜山積此天以富汝曹也勉之乃分左右軍文忠橫  
槊引鐵騎數千乘高馳下大軍繼之敵遂大潰又沐春  
嗣父英爵鎮雲南洪武時平越舊蠻立澗滄衛阿資復  
叛與何福討之春曰此賊積年逋誅者以與諸土酋姻  
婭輾轉亡匿今悉發諸酋從軍縻繫之而多設營堡制  
其出入賊必授首遂趨越州分道逼其城伏精兵道左  
以羸卒誘賊縱擊大敗之遂擒阿資



敵十五形帥十過附

宋許洞虎鈴經曰猛而輕死者可伏而挑之也智而遲者可逼之也機事疾速而不精者可誘也機緩而精者可抗也自功者可間其下也信人者可詐也不信人者可離也剛愎自用者可乘也親愛人者可侮也貪者可賂也鄙者可奪也廉者可污也清者可辱也畏鬼神者可驚也懦而好用人者可欺也將有是十五者擊之無疑也士卒使用無時者可擊也士馬秣食無時者可擊

也結營之地無出入之便者可擊也臨陣喧譁約之不止者可擊也營柵無泉源溪澗者可擊也動而不能避日耗月刑者可擊也諸將爭功者可擊也謀臣放逐者可擊也吏士怨怒者可擊也傳呼不應節者可擊也是十者但候而擊之無疑焉

察而後動

唐兵圍洛陽掘塹築壘而守之城中乏食竇建德悉衆來援太宗集將佐議之郭孝恪曰世充窮蹙垂將面縛

建德遠來助之此天意欲兩亡之也若據守虎牢以軍  
汜水伺間而動破之必矣

五代時南唐李金全將兵救河中軍於沂州之境方與  
諸將會食候騎白有漢兵數百在澗北皆羸弱請掩之  
金全令曰敢言過澗者斬及暮漢伏兵四起金鼓聞十  
餘里金全曰曷可與之戰乎於是退保海州

宋韓世忠征劉忠與賊對壘奕碁張飲堅壁不動衆莫  
測一夕馳騎穿賊營候者呵問即以賊軍號隨聲應之

周覽以出喜曰此天賜也遂伏精兵於白面山與諸將  
拔營而進賊兵方迎戰所伏兵已馳入中軍奪望樓植  
旗蓋傳呼如雷賊驚潰因斬忠

金太祖天輔時遼耶律伊都降金金以為監軍久不遷  
常怏怏伊都有叛心遣使約燕京統軍誥里反誥里亦  
契丹人時金西監軍烏舍自雲中來燕微聞其事而未  
信回行數百里因獵居庸之東遙見二騎馳遞交相遇  
於道立馬久談烏舍疑之命數騎追一人至詰曰爾何

人也曰伊都使者以軍事詣燕京統軍司誥里烏舍曰爾等適立馬話及何事曰問候烏舍曰非也問候之語無許久又曰話別烏舍曰亦非也話別之語無許久又曰叙家事烏舍曰家事固非立馬叙又曰叙往事烏舍曰往事亦非立馬叙馳者詞窮面顫且戰慄不已烏舍察其言色兼素疑伊都誥里皆契丹反覆無定因以詐折之曰我知汝二人密議反者近有人密告伊都誥里反期於今日各有使至我故來此伺果得爾輩夫何隱

焉其人謂烏舍果知不敢隱伊都之叛由是敗

元阿珠沉幾有智畧入覲與參政阿爾哈雅奏請伐宋  
帝命相臣議久不決阿珠進曰臣久在行間備見宋兵  
弱於往昔失今不取時不再來帝即可其奏詔益兵十  
萬與丞相巴延參政阿爾哈雅等同伐宋又汪良臣將  
兵攻嘉定咎萬壽堅守不出良臣度有伏兵先大搜山  
谷果得而殺之乃進壘薄城萬壽悉軍出戰大破之萬  
壽乞降

明王守仁討橫水賊始仍故事招安之因給以牛種俾力耕自新所遣使與繪者俱盡圖其山谷險易猝以秋高進兵食其所獲賊不及備大破之

驗虛聲知無實

五代漢高祖天福十二年四月

漢高祖於晉少帝開運四年二月即位仍稱天福十二年

收復承天軍軍太原東都土門所衝也乃留步卒一千戍之備其不虞時契丹還衆每驚潰敵乃焚其井邑一日之中狼烟百餘舉高祖曰此必敵之將退張虛勢也

乃遣親將葉仁魯領步騎三千趣之會敵黨發掘掠取不意軍至敗之斬級獲馬各千餘而還

金阿蘇叛奔遼太祖遣實古納尼楚赫往索阿蘇實古納等還具言遼主驕肆廢弛之狀於是議伐遼遼統軍司聞始為備命統軍蕭托卜嘉調諸軍於寧江州太祖使富卦喇復索阿蘇實觀其形勢富卦喇還言遼兵多不知其數太祖曰彼初調兵豈能遽集如此復遣呼實布往還言惟四院統軍司與寧江州軍及渤海八百人



耳太祖曰果如吾言謂諸將佐曰遼人知我將舉兵集諸路軍備我必先發制之無為人制衆皆曰善乃舉兵伐遼又宗望伐宋渡江敗宋兵於江上遣瑣都等以兵追宋主宋主入會稽若為堅守計有兵數千列陣於郭東竹葦間諸將欲擊之瑣都曰此詐也不若急攻城不然將由他門逸去諸將猶豫未決而宋主果於他門以單舟入海不獲而還

元阿珠既築壘斷襄陽糧道宋將夏貴范文虎復相繼

來援又分兵出入東岸林谷間阿珠謂諸將曰此張虛形不可與戰宜整舟師備新堡諸將從之明日宋兵果趨新堡大破之

### 敵降審察

唐突厥阿史德溫傳反與阿史那伏念合詔裴行儉總諸軍討之伏念密送降款請自効行儉不泄其事而密表以聞數日有烟塵漲天而至斥堠惶駭來白行儉召三軍謂曰此伏念執溫傳來降非他也然受降如受敵

金史紀事本末卷九十四  
但須嚴備更遣單使仍前勞之少間伏念果率屬縛溫  
傳來軍門請罪盡平突厥餘黨

宋夏州李繼遷遁斤澤都巡檢曹光實選精騎襲之繼  
遷僅以身免獲其母妻於是繼遷復結婚於豪酋轉徙  
伏匿浸以強盛使人給光實曰我數奔北勢窘不能自  
存矣公許我降乎因陳舅甥之禮期某日於葭蘆川降  
光實信之且欲擅其功故不與人謀至期繼遷設伏止  
領十數人近城迎光實從百騎赴之繼遷前導北行至

其地忽舉手揮鞭伏兵盡起光實被害又元昊遣高延德還延州與范仲淹約和仲淹自為書遺元昊反覆戒諭令去帝號盡臣節以報累朝厚待之恩韓琦聞之曰無約而請和者謀也命諸將戒嚴而自行邊至高平元昊果遣衆寇渭州薄懷遠城琦乃趨鎮戎軍盡出其兵以禦之

遼韓匡嗣耶律沙伐宋以報圍城之役耶律休格率本部兵從匡嗣等戰於滿城翌日將復戰宋人請降匡嗣

信之休格曰彼衆整而銳必不肯屈乃誘我耳宜嚴兵以待匡嗣不聽休格引兵憑高而視須臾南兵大至鼓譟疾馳匡嗣倉卒不知所為士卒棄旗鼓而走遂敗績休格整兵進擊敵乃却

元郭侃征西屢捷至大房其將珠蘇爾致書請降左右以為信然易之侃曰軍機多詐不可信也若中彼計恥莫大焉乃嚴陣以待珠蘇爾果以兵來邀侃與戰大破之巴爾蘇勒坦降下其城一百八十五又李恒圍隆興

宋轉運使劉槃請降恒察其詐密為之備槃果以銳兵突至恒擊敗之殺獲殆盡乃降又星節為湖廣行省平章政事值汝潁妖賊起會僚屬議之或曰有鄭萬戶老將也宜起而用之星節乃命募土兵完城池修器械嚴巡警悉以其事屬鄭賊聞之遣其黨二千人來約降星節與鄭謀曰此詐也然降而卻之則不可受而審之可也果得其情乃殲之械其渠魁數十人以待命適有旨召星節為大司農同僚受賂乃誣鄭罪而釋其所械者

明日賊大至內外響應城遂陷又伊蘇擒婁特穆爾布哈賊黨程思忠等乞降於參政撤凌特穆爾為請命於朝詔許之命伊蘇退師伊蘇度賊必以計急我師乃嚴備以偵之程思忠果棄城遁去亟追至瑞州殺獲萬計賊遂東走

明鄧愈駐兵于臨江之平塘時鄧克明據撫州遣使通款而實無獻城之意愈知其情捲甲夜趨比旦入城克明單騎遁

臣等謹案元劉元振為成都經畧使宋瀘州守將  
劉整密送款求降元振往受之諸將皆曰劉整無  
故而降不可信也元振曰宋權臣當國賞罰無章  
有功者往往以計除之是以將士離心且整本非  
南人而居瀘南重地事勢與李全何異此舉無可  
疑者遂行其父哈瑪爾戒之曰劉整宋之名將瀘  
乃蜀之重地今整遽以瀘降情偽不可知汝無為  
一身慮事成則為國家利不成則當效死乃其分



也元振至瀘整開門出迎元振棄衆而先下馬與  
整相見示以不疑明日請入城元振釋戎服從數  
騎與整聯轡而入飲燕至醉整心服焉元振還宋  
瀘州主帥俞興率兵圍瀘州晝夜急攻城幾陷左  
右勸元振曰事勢如此宜思變通整本非吾人與  
俱死無益也元振曰人以誠歸我既受其降豈可  
以急而棄之且瀘之得失關國家利害吾有死而  
已乃搗將士募善游者賁蠟書至成都求援又權

造金牌分賞有功未幾援至元振與整出城合擊  
興兵大敗之興退走據此實與杜典之意互相為  
用夫敵情多詐受降者固不可不審察以燭其幾  
然使過於疑則又無以服降者之心而收實效觀  
劉元振之處劉整可謂信義交至而劉整亦卒無  
叛意要惟能審察而後能不疑此又臨敵者所當  
知也謹附識於此

欽定續通典卷九十四

欽定四庫全書

欽定續通典卷九十五

兵

間諜

唐郭元振為武衛參軍會吐蕃乞和其大將論欽陵請  
罷四鎮兵元振言吐蕃倦徭戍久矣咸願和解以欽陵  
欲裂四鎮專制其國故未歸款陛下誠能歲發和親使  
而欽陵不從則其下必怨斯離間之漸也如其計後吐

蕃君臣相猜攜卒誅欽陵又李晟邏得朱泚將姚令言等謀者令釋縛飯飲之遣還敕曰為我謝令言等善為賊守勿不忠於泚乃引兵叩都門賊不敢出

宋太祖忌江南林仁肇威名賂其侍者竊取仁肇畫像懸別室引江南使者觀之問何人使者曰林仁肇也曰仁肇將來降先持此為信又指空館曰將以此賜仁肇使者歸白江南主江南主不知其間鳩殺仁肇又曹瑋馭軍嚴明尤善用間周知敵動靜時李繼遷叛徙瑋知

鎮戎軍繼遷虐用其民瑋知其下多怨即移書諸部諭以朝廷恩信以離諸羌由是康諾爾等族請內附渭州有告戍卒叛入夏國者瑋方對客奕棋不聽言者不已遽曰吾使之往也未幾夏人斬叛者投其首境上又种世衡居青澗城時夏元昊方強其貴人伊勒綱朗凌裕勒且兄弟有材謀親信用事邊臣欲以謀間之廊延經畧使龐籍兩為保安軍守劉拯書賂番部博綽以達伊勒兄弟而涇原路王沿葛懷敏亦遣人持書及金寶以

遺裕勒且會綱朗凌令朗默特實奇默囊等三人詣世衡請降世衡知其詐曰與其殺之不若因以為間留使監商稅出入騎從甚寵有僧王光信者趨勇善騎射習知番部山川道路世衡出兵常使為鄉導數盪族帳奏以為三班借職改名嵩世衡為蠟書遣嵩遺綱朗凌言朗默特等已至朝廷知王有向漢心命為夏州節度使奉錢月萬緡旌節已至趣其歸附以棗緡畫龜喻其早歸之意綱朗凌得書大懼自所治執嵩歸元昊元昊疑

綱朗凌貳已不遣還所治且錮嵩穽中使其臣李文貴以綱朗凌旨報世衡且言不達所遺書意或許通和願賜一言世衡以白籍時朝廷已欲招撫籍召文貴至諭以國家開納意縱使還報元昊得報出嵩禮之甚厚使與文貴偕來自是繼遣使者請降稱臣如舊世衡聞

伊勒兄弟誅為文越境祭之

一云綱朗凌號伊勒王裕勒且號天都王世衡既以

計誅伊勒欲并開天都因設祭境上書祭文於版述二將相結有意未朝悼其垂成而失其文離紙帛中伺敵至急燕之以歸服字不可遽滅敵得之以獻元昊天都亦以此得罪元昊既失心腹之將悔恨無及乃定和議



又岳飛知劉豫結尼雅滿而烏珠惡劉豫可以間而動會軍中得烏珠謀者飛陽責之曰汝非吾軍中人張斌乎前遣汝至齊誘致四太子何竟不報今齊使至爾乃來不亦緩乎謀冀緩死即詭服乃作蠟書若與豫誘四太子狀謂謀曰姑貸汝圖後效剗股納書戒勿泄謀歸以書示烏珠果疑豫馳白其主廢之

金世祖既平和諾克薩達富珠哩部布呼猶保薩阿宗村招之不出布呼之屬曰舒嚕舒嚕之母嫁於圖們部

達爾罕貝勒而為之妾達爾罕與族兄弟瑪賽音貝勒俱事世祖世祖欲間舒魯於布呼謂達爾罕曰汝之事我不如瑪賽音之堅固也蓋謂舒魯母子一彼焉一此焉以此撼舒魯舒魯聞之遂殺布呼而降又赫舍哩志寧討鄂幹大敗之鄂幹入於奚中志寧獲敗將碩和卓釋弗殺許以官賞縱之歸約以捕鄂幹自効碩和卓既去見鄂幹秘不言見獲事乃反間奚人於鄂幹曰陷泉失利奚人有貳志不可不察當是時鄂幹屢敗其下亦

各有心碩和卓乃與賊帥實圖根執鄂幹降又完顏霆  
改大名路提控取玉田三河香河三縣徙屯濱棣淄留  
副將孫江守滄州江降於王楫而將兵圍觀州霆乃詐  
作書與孫江約同取滄州者王楫得其書果疑孫江與  
霆有謀召江還殺之霆乃定觀州而還

明太祖駐建康陳友諒率兵六十萬順流攻取又遣使  
約張士誠同入寇太祖慮二人謀合為害益難支乃因  
康茂才與友諒舊知遣為間紹偽降約為內應招之速

來紹告以虛實使分兵三道以弱其勢遂令閩者至友  
諒軍友諒得書甚喜問曰康公何在閩者曰見守江東  
木橋乃與酒食遣還謂曰吾至呼老康為驗閩者還以  
告乃命李善長亟撤江東橋易以鐵石友諒率舟師至  
太祖命馮勝常遇春伏於石灰山側徐達於南門外楊  
璟於大勝港張德勝朱虎將艨艟出龍江闔外自總大  
軍於獅子山友諒以舟不得進徑衝江東橋見大石驚  
呼老康無應之者即遣兵登岸立柵太祖下令諸軍拔

冊爭戰伏兵起大破之友諒走還又徐達攻平江不下時莫天佑為張士誠守無錫更相脣齒其將楊茂善囚數從水中為傾達獲茂釋而厚賞之使往來為間因盡得其虛實遂破之又王守仁勘事福建路經南贛值宸濠叛亂乃與縣令顧泌約知府伍文定等起兵討賊恐濠直趨南京遣諜四出投檄言京師湖廣廣東西江浙等處各發兵數十萬以疑濠使其遲出遠近聞風有備又密致書與賊心腹李士實劉養正及閔念四吳十三

若有約內應者濠得致書人及密書遂疑士實等士實  
勸濠舍安慶直趨南京否則徑出蘄黃趨京師濠不聽  
以至於敗又沈希儀為右江柳慶參將駐柳州時象州  
武宣融縣徭反詔討之希儀謂圖勝算莫如得賊情得  
賊情莫如用謀間使官府人為之則賊生疑於是陰求  
得與徭通販易者數十人釋其罪而厚撫之使訶賊賊  
動靜希儀無不知之雖肘腋親近絕不得聞人皆以為  
神希儀初至令熟徭得出入城中無所禁因厚賞其黠

者使為謀後漸令猺婦人見其妻賚以酒食縐布其夫常以賊情告者則陰厚之諸猺婦利賞爭勸其夫輸賊情或自入府言之以故賊益無所匿形多易面為熟猺自是柳城四旁數百里無敢攘敗者

不信敵間附

唐李希烈反遷曹王臯鎮江西至豫章大集將吏得裨校伊慎擢為大將治戰艦裒兵二萬以士二千五百委慎等教之初慎嘗從希烈平襄州至是希烈懼為臯用

乃遣慎七屬甲詐為慎書行間焉德宗遣中使即軍中  
斬之臯乃抗疏論雪上章未報會賊兵泝江來寇臯乃  
召慎勉之令戰斬首數千朝廷始信其不二

臣等謹案用間之法我以間往敵亦以間來惟我

不信間而後可以用間杜典無此目謹倣其例增  
附於此

行師先在量力不可窮兵

唐李光弼討史思明時魚朝恩屢上賊可滅狀詔諭光



弼光弼固言賊方銳未可輕動僕固懷恩媚光弼功陰  
佐朝恩陳掃除計使者來督戰不得已出師北邛令附  
山阻險而陣懷恩不從賊據高原委物佯北官軍爭獲  
之伏發大潰

宋趙范趙葵欲乘時撫定中原建守河據關收復三京  
之議朝臣多以為未可獨鄭清之力主其說乃命趙范  
移司黃州刻日進兵喬行簡時在告上疏曰臣不憂師  
出之無功而憂事力之不可繼有功而至於不可繼則

其憂始深矣夫規恢進取必須選將練兵豐財足食今將乏卒寡財匱食竭臣恐北方未可圖而南方已先騷動矣不聽詔金子才合淮西兵萬人赴汴趙葵以淮西兵五萬人取泗州由泗趨汴會子才軍命楊誼等將兵入洛陽誼至洛東三十里遇敵伏兵大潰葵等亦棄汴而歸

遼太祖天贊二年皇子輝庫濟為大元帥圖魯卜為副既克平州進軍燕趙攻下曲陽北平至易州易人來拒

踰濠而陣李景章出降言城中人無鬪志大元帥將修  
攻具圖魯卜諫曰我師遠來人馬疲憊勢不可久留乃  
止軍還大元帥以其謀聞太祖大悅賜賚優渥

金太祖伐遼克臨潢府至沃赫河宗幹諫曰地遠時暑  
士疲馬乏若深入敵境糧運不繼恐有後艱帝從之遂  
班師又布薩忠義移軍壓淮境遣赫舍哩志寧率偏師  
渡淮取盱眙濠廬和滁等州宋人懼而世宗意天下厭  
苦兵革思與百姓休息詔忠義度宜以行忠義使右監

軍宗叙入奏將近暑月乞俟秋涼進發詔許之又布薩  
揆伐宋下真州宋遣陳璧來告和揆以乞辭未誠徒欲  
緩師卻之宋人不獲請成乃決巨勝成公雷塘渚積水  
以為阻盡焚其廬舍儲積過江遁去揆以方春地濕不  
可久留且欲休養士馬振旅而還元阿巴齊從皇子鎮  
南王征交趾至思明州賊阻險拒守阿巴齊選精銳  
與賊戰於女兒關斬馘萬計餘兵棄關走於是大軍深入  
進至交州陳日煊空其城而遁阿巴齊曰賊棄巢穴而

匿山海者意待吾之敝而乘之耳將士多北人春夏之交瘴癘交作賊弗就擒吾不能持久矣今出兵分定其地招降納附勿縱士卒侵掠急捕日煇此策之善者也

臨敵易將

五代梁王彥章將軍攻晉之夾寨南城段凝副之彥章血戰功獨多段凝有異志陰與梁之要臣趙巖張漢傑交通匿彥章捷書而獨進段凝所奏末帝初疑其事已而使者至軍獨賜勞凝而不及彥章軍士皆失色及楊

劉之敗疑乃誣奏彥章使酒輕敵以至於敗趙巖等從中毀之遂罷彥章以疑為招討使疑尋帥精兵數萬降唐

金宣宗貞祐三年詔諸道按察司講究防秋盧庸陳便宜有曰掌軍之官不宜臨時易代臨敵易將乃兵家所忌將非其人屢代何益時論避之

元舒穆魯額森從穆呼哩取東京時金人新易東京留守將至額森諜知之即與數騎邀而致之懷其所受誥

命至東京謂守門者曰我新留守也入據府中問吏列兵於城何為交以邊備對額森曰吾自朝廷來中外晏然奈何欲陳兵以動搖人心乎即命撤守備曰寇至在我是夜下令易置將佐部伍三日穆呼哩至入東京不費一矢又順帝至正十三年張士誠據高郵叛右丞相托克托總大軍出討數敗士誠圍高郵隳其外城城且下順帝信讒解托克托兵柄削官爵以他將代之士誠乘間奮擊元兵潰去由是復振

明世宗嘉靖時倭寇猖獗東南命張經總督江南江北  
浙江山東福建湖廣諸軍討之便宜行事時倭二萬餘  
據柘林川沙窪其黨方踵至經日選將練兵為搗巢計  
以江浙山東兵屢敗欲俟所徵兩廣狼土兵至用之乃  
遣總兵官俞大猷遊擊鄒繼芳參將湯克寬分屯金山  
衛閔港乍浦犄賊三面以待永順保靖兵之集會侍郎  
趙文華以祭海至與浙江巡按胡宗憲比屢趨經進兵  
經曰賊狡且衆待永保兵至夾攻庶萬全文華遂密疏



經糜餉殃民畏賊失機帝怒即下詔逮經以蘇松巡撫周琬代之方文華之拜疏也永保兵已至其日即有石塘灣之捷至五月朔倭突嘉興經遣參將盧鏗督保靖兵以大猷督永順兵由泖湖趨平望以克寬引舟師由中路擊之合戰於王江涇斬賊首一千九百餘級焚溺死者甚衆給事中李用敬等言王師大捷倭奪氣不宜易帥帝不聽卒論經死琬泣仕無所展布賊復熾狼土兵亦不奉琬節制大肆焚掠於是東南民既苦倭復苦

兵矣

軍政不一必敗

唐初劉黑闥引突厥寇河北淮陽王道元授山東道行軍總管師次下博與賊軍遇道元帥騎先登命副將史萬寶督軍繼進萬寶與之不協及道元深入而擁兵不進謂所親曰吾奉手詔言淮陽小兒雖名為將而軍之進止皆委於吾今其輕銳越泥濘交戰吾軍若動必陷泥濘莫如結陣以待之雖不利王而利國也道元遂為賊

所擒又蘇定方從大將軍程知節征賀魯至鷹娑川突厥引二萬騎來拒總管蘇海政與戰未決既而突厥別部鼠尼施等又領二萬餘騎續至定方正歇馬隔一小嶺去知節十里許望見塵起率五百騎馳往擊之敵衆大潰追奔二十里副總管王文度害其功謂知節曰雖云破賊官軍亦有死傷今當結為方陣輜重並納腹中四面布隊人馬披甲敵來即戰自保萬全又矯制收軍不許深入終日跨馬披甲結陣由是馬癯卒勞無鬪志

定方謂知節曰本來討賊今乃坐守何功之立哉且公  
為大將閫外之事不許自專別遣軍副專其號令理必  
不然須因繫文度飛表奏之知節不從師竟無功

五代周世宗南征徙下蔡浮橋於渦口為鎮淮軍築二  
城以夾淮時南唐元帥李景達遣朱元等屯紫金山築  
甬道以餉壽州周師連破紫金諸寨景達雖為元帥而  
兵事皆決於陳覺覺與元素有隙以元李守貞客反覆  
難信南唐主李景遣大將楊守忠代元且召之元憤怒

叛降於周諸軍皆潰景達以舟兵奔還金陵

宋潘美與契丹耶律色珍戰於飛狐敗績議引兵護雲  
應寰朔吏民內徙時色珍乘勝入寰州兵勢甚盛美副  
將楊業欲避其鋒但領兵出大石路直入石碣谷護軍  
王侁等以為畏懦欲從雁門北川中往業不可侁曰君  
侯素號無敵今逗撓不戰得非有他志乎業曰業非避  
死蓋時有未利徒殺士卒而功不立今君責業以不死  
當為諸公先將行指陳家谷口曰諸君幸於此張步兵

強弩以相援也業轉戰當至此可夾擊之不然無遺類  
矣美乃與佖帥麾下陣於谷口業進與色珍戰大敗退  
趨狼牙村佖自寅至已不得業報使人登多羅臺望之  
無所見以為契丹敗走欲爭其功即領兵離谷口美不  
能制乃緣交河西南而進行二十里聞業敗即麾兵却  
走業且戰且行至谷口望見無人拊膺大慟再率麾下  
力戰身被數十創士卒殆盡遂被擒於是雲應朔諸城  
皆復陷又李顯忠克復宿州與別將邵宏淵不相能金布

薩率步騎十萬來攻晨薄城列大陣顯忠謂宏淵併力夾擊宏淵按兵不動顯忠獨以所部力戰俄而敵大至顯忠用克敵弓射却之宏淵謂衆曰當此盛夏搖扇於清涼猶不堪況烈日中被甲苦戰乎人心遂搖無關志顯忠移軍入城統制張訓通等以顯忠宏淵不協各遁去金人乘虛復來攻城顯忠竭力捍禦敵始退宏淵又言金添生兵二十萬來儻我兵不返恐變生不測顯忠知宏淵無固志勢不可孤立遂夜引還

元囑扎爾受命參議陝西行樞密院事比入奏曰關陝要地軍務非輕阿道伊埒國之元臣陛下方委任之伏慮臨時議論不協必誤大計儻有異同臣請得以上聞帝可其奏

明李景隆與郭英吳傑合兵伐燕燕王帥諸將進駐固安謂邱福等曰李九江等皆匹夫無能為惟恃其衆耳然衆豈可恃也人衆易亂擊前則後不知擊左則右不應將帥不專政令不一甲兵糧餉適足為吾資耳爾等但秣馬厲兵以待既而戰於白溝河景隆等果大敗



軍無政令敗

宋李綱為兩路宣撫使練士卒修器甲期兵集大舉而朝廷降詔罷所起兵綱上疏言秋高馬肥敵必深入宗社安危殆未可知防秋兵盡集尚恐不足今河北河東日告危急未有一人一騎以副其求奈何甫集之兵又皆散遣且以軍法勒諸路起兵而以寸紙罷之臣恐後時有所號召無復應者矣疏上不報

金哀宗天興時聞元兵至以點檢瓜爾佳薩哈為總帥

率步兵三萬巡河渡命內族長樂監其軍行至封邱而還朝廷置而不問於是薩滿愛實上言曰薩哈統兵三萬本欲乘元兵遠至喘息未定而擊之出京纔十里不逢一人一騎已畏縮不敢進設遇元兵其肯用命乎乞斬二人以肅軍政不報

明張玉因耿炳文帥師北向往覘其營還報成祖曰炳文軍無紀律其上有敗氣無能為遂詔問諸將所嚮衆莫對玉曰當徑趨真定彼雖衆新集志未齊一我軍乘

勝可一鼓破之成祖曰玉言正合吾意吾倚玉一人足辦矣

推誠

唐張儉刺朔州屬李靖既平突厥有思結部者窮歸於儉儉受而安集之其在磧北者親屬私相過省儉不禁示羈縻而已及儉徙勝州後將謂其將叛遽以奏聞朝廷議發兵進討仍起儉為使就觀動靜儉單騎入其部落召諸首領慰諭推腹心咸匍匐歸命又郭子儀鎮河

中時僕固懷恩率吐蕃回紇等三十萬衆掠涇邠躡鳳翔入醴泉奉天京師大震召子儀屯涇陽軍纔萬人比到敵騎圍已合乃使李國臣拒其東魏楚玉當其南陳回光當其西朱元琮當其北子儀率甲騎二千出沒左右前後回紇見而問曰此誰也報曰郭令公驚曰令公存乎懷恩言天可汗已棄四海令公亦謝世故我從以來今令公存天可汗存乎報曰皇帝萬壽回紇悟曰懷恩欺我子儀又使諭之曰公等頃歲遠涉萬里剪除凶

逆恢復二京我與若休戚同之今乃棄舊好助叛臣何其愚也且懷恩背主棄親於公等何有回紇曰本謂公亡不然何以至此今誠存我得見乎子儀將出左右諫曰敵人心不可信也請毋往子儀曰敵衆數十倍吾將示以至誠左右又請以騎五百從不聽即傳呼曰令公來敵皆持滿待子儀以數十騎免胄徐出而勞之曰安乎公等久同忠義何至於是回紇皆捨兵下馬齊拜曰果吾父也子儀召其首領各飲之酒與之佳錦歡好

如初又曹王臯遷湖南觀察使前使辛京杲貪虐有部  
將王國良者戍武岡賴其富即劾以死國良懼遂散財  
聚衆據縣以叛斂諸道兵討之再歲不能下臯至遣使  
遺國良書曰觀將軍非敢大逆者蓋逃讒抗死爾將軍  
遇我何不速降我固為京杲誣者幸蒙雪何忍以兵加  
將軍哉以為不然我以陣術破將軍陣以攻法屠將軍  
城非將軍所度也國良得書喜且畏因請降然內尚首  
鼠臯即日單騎稱使者造國良壘國良延使者入臯遂

大呼軍中曰有識曹王者乎乃我也來受國良降國良  
安在一軍愕眙不敢動適有識者走至傳呼曰是國良  
匍匐叩頭請罪臯執手約為昆弟盡焚攻守具散其兵  
令赴農桑有詔赦之賜名惟新又馬燧討李懷光於長  
春宮懷光將徐庭光以兵六千守宮城禦備甚嚴燧度  
長春不下則懷光自固久攻所傷必多乃挺身至城下  
呼庭光庭光素憚燧威名拜於城上燧度庭光心已屈  
乃徐曰我來自朝廷可西面受命庭光復拜燧曰公等

皆朔方將士祿山以來首建大勲四十餘年功伐最高奈  
何棄祖父之勲力背君上為滅族之計耶從吾言非止  
免禍富貴可圖也賊衆俱不對燧又曰爾以吾為欺邪  
今相去不遠數步爾當射我乃披襟示之庭光感泣俯  
伏軍士亦泣下乃率衆出降燧以數騎徑入城處之不  
疑莫不畏服

五代唐李茂貞為鳳翔節度性至寬有部將符昭者人  
或告其謀變茂貞親至其家去爪牙熟寢經宿而還上



下遂服之

宋宗澤尹開封威望素著會巨寇王善擁衆七十萬車  
萬衆欲據京城澤馳至其營泣曰朝廷危難乃汝立功  
之秋不可失也善感泣曰敢不効力遂解甲降又魏勝  
知海州治軍旅獲金諜者犒以酒食厚賂遣還自北  
方來歸者與之同卧起共飲食示以不疑周其饑乏使  
之感激自是山東河北歸附者衆得金人虛實悉以上

聞

金蕭仲恭使宋且還宋人意仲恭耶律伊都皆有亡國之戚而伊都為金監軍有兵權可誘而用之乃以蠟丸書令仲恭致之伊都使為內應仲恭素忠信無反覆志但恐宋人留不遣遂陽許還見宗望即以蠟丸書獻之宗望察仲恭無他薄罰之於是再舉伐宋又楊仲武遷同知臨洮尹臨洮地接西羌與瑪爾布雜居邊將貪暴瑪爾布苦之遂相率為寇仲武乃從數騎入其營諭之曰此皆將校侵漁汝等以至此爾今懲治此輩不復擾害

汝也并以禍福曉之羌人喜悅寇掠遂息後瑪爾布復掠熙河主帥使人諭之不肯去曰楊總管來我乃解去熙河具奏詔復遣仲武當是時瑪爾布謂仲武不能復來及仲武至與其酋帥相見責以負約對曰邊將苦我我之來求訴於上官耳今幸見公願終不復犯塞乃舉酒酌天折箭為誓仲武因以危酒飲之曰當更為汝請若復背約必用兵矣羌人羅拜而去

元安扎爾討平涇州師還原州降民棄老幼夜亡走衆曰此

必反也宜誅之以警其餘安扎爾曰此輩懼吾驅之北徙耳  
遣人諭之曰汝等若走以軍法治罪父母妻子併誅矣汝歸  
保無他於是州民皆復歸豪民陳苟集數千人潛匿新寨諸  
洞衆議以火攻之安扎爾曰招諭不出攻之未晚遂偕  
數騎抵寨縱馬解弓矢召苟遙語折矢與為誓苟即相  
呼羅拜謝更生之恩皆降又賽音諤德齊鎮四川宋將  
咎萬壽擁強兵守嘉定與賽音諤德齊軍對壘一以誠  
意待之不為侵掠萬壽心服未幾賽音諤德齊召還萬

壽請置酒為好左右皆難之賽音諤德齊竟往不疑酒至左右復言未可飲賽音諤德齊笑曰若等何見之小耶咎將軍能毒我其能盡毒我朝之人乎萬壽嘆服又呼遜為河南等路宣慰司同知以河南多強盜往往羣聚山林劫殺行路官軍收捕失利乃以招安自任遣土豪傳檄諭之未幾賊二人來歸呼遜賜之冠巾且諭之曰汝昔為賊今既自歸即良民矣悉放還令遍諭其黨數日後招集其為首者十輩來身各長七尺餘羅拜庭

下呼遜命吏籍其姓名為民時召而飲食之皆得其歡  
心羣盜聞之相繼款附

明太祖擒陳兆先悉降其衆釋兆先而用之擇其驍兵  
五百人置麾下五百人者多懷疑懼太祖覺其意是夕  
令入宿衛環帝而寢悉屏舊人於外獨留馮國用一人  
侍卧榻傍太祖解甲酣寢達旦疑懼者始安又處州寇  
葉宗留等憑恃險阻乘間時出官軍討之又復遠遁屯  
師日久計無所施陶成乃從僕隸四五人徑抵賊巢諭

以禍福言辭懇惻宗留等悚動悔罪率衆出降

示信

唐蘇定方既擊破賀魯至怛篤城有敵人降附副總管王文度曰師還而降且為賊不如殺之取其貲定方曰此乃自作賊耳何以稱伐叛哉及分財定方一無所取後俘都曼請於帝曰臣向喻陛下意許以不死帝曰朕為卿全信宥之葱嶺以西遂平

宋种世衡知環州蕃部有努鄂者素倔强未嘗出謁郡

守聞世衡至遽郊迎世衡與約明日當至其帳往勞部  
落是夕大雪深三尺左右曰地險不可往世衡曰吾方  
結諸羌以信不可失期遂緣險而進努鄂方卧帳中謂  
世衡必不能至世衡蹙之起努鄂大驚曰前此未嘗有  
官至吾部者公乃不疑我耶率其族羅拜聽命

金宗望率兵討張覺覺敗奔宋宗望使以詔書宣諭城  
中張敦固等出降使使與敦固俱入城收兵仗城中人  
殺使者立敦固為都統乘城拒守敦固以兵八千分四隊



出戰大敗宗望再三開諭敦固等曰屢嘗拒戰不敢遽降宗望許其望闕遥拜敦固乃開其一門宗望使揀摩奏其事遂下詔赦南京官民大小罪皆釋之官職如舊元史天祥獲金將完顏和斯穆呼哩欲殺之天祥曰殺一人無損於敵適驅天下之人為吾敵也且其降時嘗許以不死今殺之無以取信於後不若用之乃以為千戶又鍾明亮以循州叛帝命管如德統兵討之諸將欲直搗其巢穴如德曰嘻今田野之氓疲於轉輸介冑之

士病於暴露重困斯民而自為功吾不為也於是遣使  
諭以禍福明亮感如德誠信即擁十餘騎詣贛州石城  
縣降平章政事鄂羅齊怒其跋扈不臣欲以事殺明亮  
如德聞之曰皇元仁厚未嘗殺降明亮叛人何足惜所  
重者信不可失耳

示義

唐侯君集伐高昌率兵至柳谷候騎言其國王文泰尅  
日將葬諸將請襲之君集曰不可天子以高昌驕慢無

禮使吾恭行天罰今襲人於墟墓之間非問罪之師也  
於是鼓行而前又李晟既克京師勒兵屯於含元殿號  
令諸軍曰長安士庶多陷賊庭若小有震驚則非伐罪  
弔民之義也晟與公等各有家室離別數年今已成功  
相見非晚五日內不得輒通家信違命者斬乃遣京兆  
尹李齊運告諭百姓居人安堵秋毫無所犯尚可孤軍  
人有擅取賊馬者晟立斬之莫敢仰視士庶無不感悅  
又裴度為節度招撫使平淮西蔡人大悅初吳元濟禁

偶語於道夜不然燭人或以酒食相過從者以軍法論度乃約法惟盜鬪殺外餘盡除其往來者不復以晝夜為限度以蔡卒為牙兵或以為反側之徒其心未安不可自去其備度笑而答曰吾受命為帥元惡就擒蔡人即吾人也父老無不感泣

宋曹彬圍江南城將下忽稱疾不視事諸將來問疾彬曰余之疾非藥石所能愈唯諸君誠心自誓克城之日不妄殺一人則自愈矣諸將許之明日城陷一無所殺

李煜詣軍門降待以賓禮封府庫籍圖書金帛以歸於  
朝秋毫無犯江南遂安又至道中交趾酋長黎桓不順  
海賊頻年剽劫朝廷加恩於桓以轉運使陳堯叟為國  
信使初將命交趾者必獲贈遺數千緡桓所賦斂往往  
斷民手足堯叟知之遂召桓子授以朝命却其私覲又  
桓界先有亡命來奔者鎮將多匿不遣堯叟悉捕亡命  
歸之且戒勿加酷法交趾感恩併捕海賊為謝

金熙宗皇統元年毛碩知拱州宋將張俊據亳州而柘

城酒監房人傑叛以應俊碩發兵討之至柘城躬叩城門呼耆老以諭意縣人縛人傑以降碩逕入縣署召百姓慰安之衆皆感悅

元世祖以宋張世傑據台州而閩中亦為宋守勅董文炳進兵文炳所過禁士馬無敢履踐田麥曰在倉者吾既食之在野者汝又踐之新邑之民何以續命是以南人感之不忍以兵相向次台州世傑遁諸將先俘州民文炳下令曰台人首效順於我我不暇有故世傑據之其

民何罪敢有不縱所俘者以軍法論得免者數萬口至  
温州未下令曰毋取子女毋掠民有衆曰諾其守將火  
城中逃文炳亟命滅火追擒其將數其殘民之罪斬以  
徇逾嶺閩人扶老來迎漳泉建寧邵武諸郡皆降又羅  
槃旬叛賽音鄂德齊往征之有憂色從者問故賽音諤德  
齊曰吾非憂出征也憂汝曹冒鋒鏑不幸以無辜而死  
又憂汝曹刼掠平民使不聊生及民叛則又從而征之  
耳師次羅槃城三日不降諸將請攻之賽音諤德齊不

可遣使以理諭之蘿槃主曰謹奉命越三日又不降諸將奮勇請進兵賽音諤德齊又不可俄而將卒有乘城進攻者賽音諤德齊怒遽鳴金止之召萬戶叱責之曰天子命我安撫雲南未嘗命以殺戮也無主將命而擅攻於軍法當誅命左右縛之諸將叩首請俟城下之日從事蘿槃主聞之曰平章仁義如此吾拒命不祥乃舉國出降將卒亦釋不誅由是西南諸夷翕然款附明太祖以諸將破和陽多暴橫殺人城中民夫婦不相



保乃諭之曰諸軍自滁來多擄人妻女使人夫婦離散軍無紀律何以安衆凡軍中所得婦女悉還之於是民家室得完遠近悅服又太祖欲取鎮江慮諸將濫殺乃命徐達為大將諭之曰爾等當體吾心戒輯士卒城下之日毋焚掠毋殺戮有犯令者處以軍法縱之者罰無赦達頓首奉命師至鎮江元平章鼎鼎遁去即克其城兵不血刃號令嚴肅秋毫無犯又陳友諒引兵襲金陵敗潰奔還尋遣其將張定邊陷安慶府太祖乃下令諸

將曰陳友諒賊殺其主僭稱大號侵我太平犯我建康  
今又以兵陷我安慶觀其所為不滅不已爾等其厲士  
卒以從徐達曰師直為壯今我直而彼曲焉有不克劉  
基曰取威制敵以成王業在此時也遂督諸帥率舟師  
乘風溯流而上克安慶長驅向江州又大破之友諒奔  
武昌其偽相胡廷瑞等皆來降

欽定續通典卷九十五